

समां - 12:25 hrs.

CM –Education Schemes

मुख्यमंत्री उमर अब्दुल्ला हों बन्ने आले जिले-पुंछ च लाई गेदी इक जायजा बैठक दे दुरान शिक्षा सहायता योजनाएं तैहत डेढ़ करोड़ रुपें दी रकम जारी कीती। इस मौके पर बैठक गी सम्बोधित करदे होई मुख्यमंत्री हों ज़ोर देइयै आखेया जे उंदी सरकार शैक्षणिक सुविधाएं च सुधार आहनने- सार्वजनिक ढांचे गी तगड़ा बनाने ते खिते दे आर्थिक विकास गी बढ़ावा देने बक्खी चेचा ध्यान देआ करदी ऐ। उनें आखेया जे एह सारी गैह पैहलकदमियां- इक बरोबर ते सामे विकास गी जकीनी बनाने ते लोकें दे जीन जीने दे मय्यार गी बेहतर बनाने आस्तै अत लाज़मी न। उनें अधिकारियें गी निर्देश दिते जे ओह बक्ख-बक्ख मैहकमें बशकार तालमेल जकीनी बनांदे होई कम्में च हासल प्रगति दी लगातार निगरानी करन ते सब्भनें स्तरें पर जोआबदेही जकीनी बनान।

CS Youth

मुख्य सचिव अटल डुल्लु होंरें केन्द्र शासित प्रदेश दे नौजवानें लेई इक व्यापक ते बड़्डी कौशल कार्य-योजना तयार करने आस्तै कल इक उच्ची सतह दी बैठक दी प्रधानता कीती।

राष्ट्री शिक्षा नीति कन्ने मेल खंदे इक तगड़े कौशल विकास तंत्र दी जरूरतें पर जोर दिंदे होई-उनें भविष्य लेई तयार पेशवरें गी आकार देने च स्कूलें-कालजें ते युनिवर्सिटियें दी

भूमिकाएं पर लौ पाई। मुख सचिव होरें कम्म-रोजगार दे सार्थक मौके जकीनी बनाने लेई नौजवानें गी ऐसे कौशल कन्नै लैस बनाने दी जरूरतै पर जोर पाया ऐ- जेहड़े अगगे चलियै कम्म-रोजगार दे तगड़े मौके हासल करने च मददगार बनन। इस मौके पर अधिकारियें ते होरनें सरबंधत धड़ै- जम्मू-कश्मीर दे नौजवानें गी उद्योगें कन्नै जुड़े दे हुनरें कन्नै लैस करने ते आर्थिक ते तकनीकी मंगें पर खरा उतरने आले हुनरमंद कार्यबल गी तयार करने जनेह विशें पर चर्चा कीती।

<><><><><><>

FFI

56मां अंतराष्ट्रीय फिल्म महोत्सव (IFFI) 2025 अज्ज गोवा च इक शानदार समापन समारोह दे कन्नै सम्पन्न होग- जेहदे च दिग्गज अभिनेता धर्मेन्द्र होरें गी श्रद्धांजलि दिती जाग। 20 नवम्बर थमां शुरु होए दे इस महोत्सव च 81 मुलखें दियां 240 शा मतियां फिल्मां दस्सियां गेइयां- जिंदे च कुल संसारी सिनेमा दियां बेहतरीन फिल्मां बी शामिल न। तोंआई एहदे च जम्मू-कश्मीर दी बी सक्रिय भागीदारी दिखने गी लब्बी। जम्मू-कश्मीर सूचना विभाग आसेया वैक्स बजार च स्टॉल लाया गेदा हा- जिसी फिल्म प्रेमियें आसेया खासी दिलचस्पी हासल होई।

<><><><><><>

JKTPO

44में भारतीय अंतराष्ट्रीय बपार मेला (IITE)-2025 च जम्मू-कश्मीर दा पंडाल कामयाबी कन्नै सम्पन्न होआ। मेले च जम्मू-कश्मीर दे पंडाल नै 13 करोड़ 50 लक्ख रुपे दी बिक्री कीती ते इसी 6 जहार शा मते संगठनें ते व्यक्तिगत कारोबारिये कोलां बपार आस्तै दिलचस्पी दिक्खने गी लब्बी। इस पंडाल च जम्मू-कश्मीर दे मशहूर दस्तकारी- हथकड्डी ते राई-बाई उत्पादे गी प्रदर्शित कीता गया- जिन्हें घरेलू ते अंतराष्ट्री खरीददारें गी बड़ा मता आकर्षित कीता। इस दौरान सीनियर अधिकारिये संस्कृति ते बपार गी रलाइये कीते गेदे सैहकारी जतनें दी सराहना कीती। भविक्ख गी दिक्खदे होई जम्मू-कश्मीर दे बपार गी बदाने सरबन्धी संगठन जम्मू-कश्मीर ट्रेड प्रमोशन ऑर्गेनाइजेशन (JKTPO) नै अगले बरे हिस्सेदारी गी होर बधाने पर जोर दिता ऐ। एदे बजार तगर पुज्ज बधाने ते इक प्रमुख आपूर्ति आहले गंतव्य दे रुपै च जम्मू-कश्मीर दी स्थिति गी होर मजबूत करने आस्तै नमें उत्पाद पेश करने दी योजना बनाई गई ऐ।



JK Power Progress

जम्मू-कश्मीर नै नमें सिरेया त्यार बिजली दी बंड सरबन्धी सैक्टर आली योजना तैहत पूरे प्रदेश च 3 लक्ख 81 जहार शा मते स्मार्ट मीटर लांदे होई इस दिशा च 40 प्रतिशत प्रगति हासल करी लैती ऐ। नवम्बर -2020 च रम्भी गेदी इस परियोजना दे तैहत 2026 तगर 9 लक्ख 50 जहार स्मार्ट मीटर लाने दा लक्ष्य मित्थेया गेदा ऐ। बिजली विकास विभाग आसेया जारी एकड़े सुधारें दा मकसद- दक्षता च होर सुधार आहनना- बिजली ढांचे गी तगड़ा बनाना ते बिजली सरबन्धी नुक्सानें गी घट्ट करना ऐ। ध्यानजोग ऐ जे जम्मू

खिते च अजें तोड़ी इक लक्ख 87 जहार जिसलै के कश्मीर च इक लक्ख 93 जहार स्मार्ट मीटर लाई दिते गेदे न।



Kashmir Awards

कश्मीर दे दंऊ कुशल कारीगरें रैनावाड़ी दे मंजूर अहमद खान ते अलामगीरी बजार दे ख्वाज़ा नज़ीर अली होरें गी केन्द्री कपड़ा मंत्रालय आसेया दस्तकारियें दी श्रेणी च बड़ी मती प्रतिष्ठत आले राश्ट्री सम्मान कन्नै नवाजेया गया ऐ। दस्ती तौर पर कलीन बुनने ते सोज़नी कढ़ाई च उत्कृष्टता लेई इनें कुशल कारीगरें गी औंदी 9 दिसम्बर गी नमीं दिल्ली दे विज्ञान भवन च राष्ट्रपति हुंदे आसेया एह सम्मान भेंट कीते जागंन। इंदे इलावा दंऊ होरनें कारीगरें मशकूर हमीद ते मीर अरशद हुसैन हुंदा बी बशेश जिक्र कीता गया ऐ। अधिकारियें दा गलाना ऐ जे इस सम्मान कन्नै कश्मीर दियें दस्ताकरियें गी घरेलू ते अंतराश्ट्री बजारें च नमीं पंछान हासल होग।



Weather Update

जम्मू-कश्मीर च अगले 5एं दिनें दे दरान तापमान च इक शा 2 डिग्री सैल्सियस तगर दी होर कमी आई सकदी ऐ। मौसम विभाग मूजब औंदी 2 दिसम्बर गी खासकरियें दपैहरी लै मौसम बदलोखड़ा बने दा रौहग। ऊआं 3 ते 4 दिसम्बर गी मौसम साफ रौहग। एहदे मगरा 5 दिसम्बर गी दपैहरी दे बेल्लै फही बददल घनोई सकदे न ते इस दरान कश्मीर च

मती सारी थाहरें ते जम्मू खिते दे किश इलाकें च हलके थमां दर्मेयाने दर्जे दी धुंध पेई
सकदी ऐ। इस अवधि दरान किश इलाकें च रातीं दे तापमान च गिरावट दर्ज कीती जाहग।

<><><><><><>